

## **Placi Loretz, Selva 1930-2002**



bb-Prest ein 6 meins vargai che Placi Loretz rauasa en santeri. Tuttina eis ei buca memia tard per far in paus e seregurdar dil defunct. Ton spert varga il temps, ton grondas ein las truschas dad oz il di che nus dumandein sez enqualga, viva quel ni viva quella aunc. Era sche nies mund cheu en nossa cuminanza ei savens pigns e stretgs, dat ei liungs temps ch'ins ni s'entaula ni auda d'in ni l'auter pli. Con spert ein aschia lu nos defuncts emblidai.

Placi Loretz ei turnaus avon entgins onns da Klooten si en nossa Val. El ha mai giu piars il contact cheu. Passentar vacanzas ed en special igl ira cun skis ha el il pli savens gudiu denter nos cuolms. En special il sport d'unviern, siu hobby preferiu ha el frequentau aschi ditg sco igl ei mo stau pusseivel. Returnaus si dalla Bassa ha el priu dimora a Rueras. Igl onn 1998 ha la sanadad sfurzau el da serender a Sedrun en casa s. Vigeli. Leu eis el restaus ed il davos tschancun ei stau il viadi a Glion el spital. El ei morts ils 6 da fenadur en consequenza da sia malsogna.

Il Placi ei naschius a Selva ils 18 da december 1930 sco tschunavel affon da Gion Antoni e Constanzia Loretz-Berther. Aunc tschun fargliuns ein suandai el. Ina gronda famiglia, ina famiglia purila nua che tut haveva da luvrar, segidar e barhar. Selva era lu in vitg spirmain puril, cun semegliontas grondas famiglias. La fadigia era scarta, ils unviarns liungs, bia buobanaglia e cheu vegn ei a ver giu ina atgna dinamica denter quels. Aunc oz auda ins ils da Selva a raquintar da lur furbarias. Quei vegn era a ver formau il Placi. El ei buca senuspius da dir siu meini, beinenqualga buca adina fruntau il dretg tun e plaid. - Auteruisa saveva el esser survetscheivels e segidar sco el mo saveva e pudeva. - Gie sch'iins savess magari veser egl intern d'in carstgaun, con savens fuss il viver denter nus pli levs.

A Selva era la lavur da lura dada. Bia variaziun dev'ei buca. Gidar a far il pur ed ira ad alp. Muort munconza da lavur el temps da giuventetgna eis el lu serendius a Turitg e survegnii lavur tier la Swissair. Saver luvrar leu era prest in privilegi, saver marischar entuorn aviuns, far schizun enqual viadi ora el mund quei era in auter mund che si denter Péz Maler e Crispalt. Cheu mirav'ins lu schon si sin talas persunas. Biabein 30 onns ha el luvräu leu e la sanadad ha lu sfurzau el da calar ed aschia eis el returnaus per adina en sia patria tuatschina. Cheu eis el naschius e cheu ha el anflau siu davos ruaus.